

元始天尊濟度血湖真經卷下
爾時

元始天尊告諸大聖妙行真人同下界眾生
五濁色身不識因緣罪福貪著淫慾或為女
身生育男女橫遭厄難或生異疾夭喪天年

展轉輪迴不自知覺告諸眾生能發善心恭
敬三寶不殺不害不嫉不妬不淫不盜不貪
不慾不憎不相奉戒冥心能持是經功德即
有十天善神護法神王九天衛房聖母監生
大神與元量天真大聖俱來衛護

天尊言道生一一生二二生三三生萬物負
陰抱陽恍惚惚惚其中有物其中有物其名
不去萬物歸之終不為大視之不足見聽之
不足聞用之不足既矣眾等聞說是經各各
會道觀心怡神默悟是時太一救苦天尊請
天上帝慈悲救苦諸大真人承

元始之威光頌宣三元符命普告北陰世界
九幽長夜無間溟泠破石血湖諸大地獄之
中救領眾生咸得超度
天尊復告眾真曰吾今演說即是靈寶昇玄

濟度血湖真經昔秘紫微上宮三天典藏盟
真有禁四萬劫一傳今當劫運告終大法宜
行斯可下傳人間流通轉誦其有男女若能
如法修行利益人天獲福元量於是重宣
三元秘梵天寶靈書

一炁成真 二儀運虛 五靈續絕 七曜扶衰
旋網躡空 飛步雲宮 胚胎有始 億劫无終
金城孕質 玉洞凝神 真氣內養 以成真人
上入太虛 下通幽泉 雲宮寶室 中有真魂
出入福鄉 周旋生門 咀嚙靈芝 灌漱金泉
甘露川流 懸澗丹田 紫霞朝映 三炁凝煙
瓊室化仙 安座金蓮 真儀掩日 塵劫為年
爾時

天尊重告諸仙真人曰人生幾何易生易滅
如彼石火不得長久如彼浮沤豈能堅固生
老病死日夜相侵變滅不常須臾散壞宜爾
忘乎目則光溢无極泯乎耳則心識常淵兩
機俱忘淳淳全全合乎大方溟溟津津合乎
无倫我之所維與天地共為長久於是諸仙
眾等聞

天尊演說度人津梁功德不可思議各各稽
首禮謝信受奉行

元始天尊濟度血湖真經卷下 終